

夏  
峯  
先  
生  
集

夏峯先生集卷之八

容城孫奇逢啟泰著

大梁書院重刊

傳

楊忠愍公傳

忠愍公名繼盛字仲芳號椒山北直容城人生有異質  
然幼遭家難狼狽孤苦難以殫述八歲卽善牧牛時親  
里塾諸生掛容吟誦心輒愛羨之欲從讀書兄以其幼  
不可繼盛日幼任牧牛乃不任學耶又告於父始得受  
書一日客至無酒沽於市塾師出對云無酒是窮主繼

盛對曰有兒爲名臣又同學者嘗窺師出作陳戰之戲  
師歸衆皆藏匿師出對云藏形匿影繼盛應聲曰顯姓  
揚名蓋終身之品業於童年蚤券之矣十八歲補博士  
弟子員二十五歲舉於鄉三十二歲成進士是年爲嘉  
靖辛未初授南吏部驗封主事剔宿弊立章程吏曹肅  
然考功郎鄭曉一見謂諸僚曰此人心志氣節事業將  
來不可量也因告以居官守身之道時關西韓邦奇爲  
南大司馬負重名公從受樂三月而得其數又踰月而  
得其神邦奇則舉天文地理太乙六壬奇門兵書悉以

授之會諸寮有講學者繼盛又相與講論或謂此輩多  
立黨作僞沽譽繼盛曰道者吾性分所當爲可逆億人  
之僞而不爲耶嘗自言予於死生利害義利之關見之  
甚明皆講學之力也登泰山題句云志欲小天下特來  
登泰山仰觀絕頂上猶見白雲還末序云向謂泰山爲  
高也今知其特高於地耳山之上高固無窮也蓋眞見  
得學無止法如此陞兵部車駕員外時邊事方亟而部  
曹承習上下文書爲支吾大不愜會仇鸞議開馬市部  
議推繼盛行繼盛具疏言馬市決不可開然旣以遣臣

臣言其不可是避難也謹條陳五事一必令俺答愛子  
入質二令盡還掠去邊氓三議開市後別部落入寇俱  
責保約四欲平馬價分爲三等五欲整兵以備戰守毋  
玩忽以生鹵心堂上官聞之曰如此則馬市不得開矣  
乃別遣主事行而繼盛乃上疏斥其十不可五謬一謂  
忘天下之大仇二謂失天下之大信三謂損國家之重  
威四謂墮豪傑向用之志五謂懈天下飭武之心六謂  
開邊方句遑之門七謂啟百姓不靖之漸八謂長外蕃  
輕中國之心九謂墮遠人狡詐之謀十謂貽後日難繼

之禍苟能修備何藉于羈縻謬一旣和矣馬安用之且  
彼安肯以壯馬予我謬二互市不已必至朝貢朝貢而  
中國之竭財益甚謬三中國開市能盡給其衆乎不給  
則不能無入掠謬四如曰佳兵不祥譬癰疽毒日內攻  
而憚用藥石可乎謬五上三閔之曰繼盛言是旨甚溫  
而鸞有揭帖進乃下八大臣會議鸞寵方盛八人皆中  
澠附和許開市遂逮繼盛獄訊謫狄道典史故事謫官  
者不事事繼盛乃日求民利病興革之疏洮水以灌園  
圃開煤山以省薪芻狄道應徵糧草官無冊籍獨聽書

算生操輕重乃集書算生科綜之往時飛詭之弊盡絕  
又鬻乘馬及室人服飾買民間最重賦地二千畝倣古  
井田意割授諸生使畝入粟以給筆札及婚喪之費上  
官每以易褐一事爲地方累繼盛力禁之乃止創建書  
院一區中三楹爲道統祠祀歷代帝王聖賢及各名儒  
聚諸生肄業其中番漢生童數月後各知揖讓敬長上  
其父兄亦忻忻然曰楊公來何遲也比去哭送者千餘  
人明年遷諸城知縣豪強斂跡盜賊屏息尋遷南戶部  
主事甫到任卽陞北刑部員外未至都改兵部武選司

員外繼盛念一歲四遷其官思所以報國者於是以左  
口日食具疏劾嚴嵩十罪五奸十罪謂壞祖宗之成法  
竊人主之大權掩君上之治功縱奸子之僭竊冒朝廷  
之軍功引背逆之姦臣誤國家之軍機專黜陟之大柄  
失天下之人心壞天下之風俗五奸謂上之左右皆嵩  
之間謀上之納言皆嵩之鷹犬上之爪牙皆嵩之爪葛  
上之耳目皆嵩之奴僕上之臣工皆嵩之心腹未有或  
召問二王等語疏入復下鎮撫司訊問主使並引用二  
王之故繼盛曰今廷臣皆嵩黨孰爲主使奸臣誤國能



欺皇上必不能欺二王蓋二王年幼常不見上好臣必  
不防避至親莫若父子故幸上問之二王必能言之也  
拷訊楚毒終不饒又明日下錦衣衛杖一百依詐傳親  
王令旨律論死方詣衛受杖有遺以蚺蛇膽者繼盛笑  
曰椒山自有膽何必蚺蛇哉談笑赴杖屢死復甦太息  
曰忽然而死忽然而生如睡又醒人之死生固甚易也  
獄司憚嵩拘繫甚固繼盛自剖腐肉去膿血楚甚而泰  
然安之王比部世貞爲奔走求救王司業材詣嵩爲力  
解嵩陽爲許諾而爲子世蕃及門客所持材流涕爭之

不得而繼盛竟死年纔四十歲前一日猶據樞牀自著  
年譜作家書屬身後事神氣安閒如無事時赴義時尙  
吟二絕句云浩氣還太虛丹心照萬古生前未了事留  
與後人補天王自聖明制度高千古平生未報恩留作  
忠魂補至隆慶初贈太常少卿謚忠愍妻張宜人抗疏  
請代夫死語甚壯爲嵩所抑不得達長子應尾官順天  
治中有直聲仕至尙寶寺丞人謂椒山有後云次應箕  
卽獄中與都御史王遴約爲婚姻者也

歲寒老人曰先楊爵下獄時浦鉉周天佐輩猶相繼上

疏救之至忠愍下獄同鄉親友畏禍絕跡獨王繼津結  
婚獄中王鳳洲以周旋獲罪二公之外蓋寥寥也嵩之  
積威比黨噫甚矣然公之受禍雖慘而天之所以成公  
者實深明代忠臣多矣其轟烈震動天地者公之外曾  
有幾人方其從苑洛受樂旣得其數又得其神徧習天  
文地理奇門遁甲之書猶曰此儒者餘事也與同人講  
論則一一力行皆曰椒山可語進道矣至狄道則築道  
統祠以鼓勵士子嗚呼使公而不以忠死豈不足爲

學之宗哉

趙忠毅公傳

忠毅公名南星字夢白號儕鶴北直高邑人卓犖負大節悲歌慷慨輕死重氣萬曆甲戌進士除汝甯推官陞戶部主事調吏部歷考功郎澄汰流品皎若冰鏡常靜坐篝燈精心參酌有蟲巢於耳繭成而不自覺以不畏強禦忤時相削籍行人高攀龍抗疏分別忠佞極言閹臣不當陰除異已鋤善類以空人國遂謫去助教薛敷教疏諍亦謫南星林居三十年以名教爲已任海內清名之士淹久不用者其應和益廣而羣小疾其厲已爭

相標目遂譁然以高邑爲質的天啟初起廢籍以太常  
少卿歷左通政太常卿部右侍郎陞左都御史有申  
明憲職諸疏內察力絕情面作四凶議以處大猾尋改  
吏部尙書有再剖良心等疏推高攀龍總憲楊漣副院  
左光斗僉院鄒維璉夏嘉遇程國祥等入銓曹魏大中  
輩相次枋用羣小滋不悅會高攀龍以考覈四道御史  
視閹之私人崔呈秀於是羣小合謀嫉魏忠賢曰東林  
必殺公忠賢怖且悲所謂東林者蓋指南星與攀龍皆  
顧憲成東林黨也於是假會推事盡逐東林爲魏廣微

陳九疇等誣陷與攀龍同罷閣臣孫承宗疏謂兩臣去  
而出於上意則皇上之獨攬未必協天下之公令去兩  
臣而出於惡兩臣者將內結外援天下盡入其牢籠而  
大患立至不報明年以張訥及梁夢環疏削籍提問追  
奪詔命懸坐贓一萬五千兩戍山西代州子清衡戍陝  
西莊浪衛甥王鍾麗陝西永昌衛父子甥各居一城而  
子與甥以撫按郭尙友馬逢皋宿恨笞責慘毒備嘗丁  
卯冬卒戍所崇禎御極贈太子太保賜祭葬廕謚忠毅  
南星爲文章疏通軒豁能暢所欲言不拘尺幅有朱元

知家之風至於排擊朋黨伸雪忠憤抑塞磊落萬厯間  
惟公爲首其詩瘦勁有風致文集若干卷行世

裁寒老人曰神宗朝天下恬熙小人近倖孽芽其間一  
二君子奮起下位擢挂國是而朋黨之論始出所謂一  
二君子者公與無錫顧公其尤也景逸舉進士實出公  
之門當公被逐景逸以疏救謫顧亦以言事罷羣小譁  
然曰諸公爲東林質的於是璫兒熾息不盡殺諸公不  
止嗚呼朋黨之禍至於斯極矣公實與之終始公於魏  
南樂素以父執自處無少假南樂因同姓嚴事璫致揆

席公愈菲薄之或納賄肆闕說執不可一日踵門請見  
門者曰休矣將脫幘而寢南樂怒置而去又嘗短李淮  
撫于公前公曰若忘修吾以戶部郎上疏救若翁耶南  
樂慚退日與璫比而媒蘖公

鹿太公傳

太公名正號成宇侍御豫軒公長子太常伯順公父也  
侍御宦游正拮据家務一意以明農課子爲已任故侍  
御得無內顧憂太常未嘗北面一塾師而業就生平勤  
儉持家卹人之急甚於已當厄之與甯直無難色恆慮



人有難盡之言也表弟劉正心以一言之諾養其妻子  
終身爲之娶婦者二嫁女者二蓋慷慨好施自其天性  
與人不設城府不岐面背臨事斬然有斷性簡朴聲色  
服御去之若浼惟以孝友節義誨人并以自律侍御寢  
疾躬侍湯藥衣不解帶者三年嘗一夕數起假寐几榻  
間微聞侍御欠伸狀卽屏息而俟早夜禱瘳頭鬚爲白  
其侍母夫人日夕依戀太常常一再迎養京邸席未煖  
而歸裝已束曰柰何戀游子而牽堂上老人遠思也七  
十歲居母喪猶寢苦食淡哭泣如禮終身之慕殆謂是

與篤念手足與弟直友歡垂白無間鰥居日太常欲擇  
一侍媵奉起居正日若以而翁爲苦耶吾自覺無不足  
處風雨蕭然彌發嘯詠性不解飲而雅好客流連下榻  
兩夜不倦客或請少休笑謂君豈以老夫爲醒眼君輩  
舉爵吾汨汨亦若有酒腸也枯棋三百拉一二同調槃  
礴其間竟日對壘並忘勝負制詞有云溪山寄傲覺海  
鷗猶有機心木石與居笑雲鶴仍無定性得公神矣恩  
命三錫年登八旬每出入安步閑中卽往返百餘里亦  
止一僕一騎無異布衣時日吾幸未億庶幾與里閑故

舊遇諸塗何可使其引避而轍迹畏人將無挾兒輩尊  
寵於車上儻哉有司至門恆踰垣以避歲請鄉飲始勉  
一赴後絕不往孫化麟中辛酉解元製一褐袍太常自  
塞上歸一裘爲壽正復嚴戒之嘗謂生不能挽流習而  
席祖父以自張藉子孫以自奉此其人殊堪嗚噓蓋以  
高風古韻追踪爲王彥方陳太邱逾四十年鄉里蒸蒸  
何論家庭間矣至天啟中璫禍起網羅密布一時如左  
魏周諸君子皆太常密友方其遭禍三家子弟賓客  
繹江村謀所以爲左右力正挺身周旋不計禍患甚至

釀金應比聲聞長安旁觀者代爲公危正不顧第曰老人籌此已熟不知命無以爲君子義豈肯惜一身爲吾子蘭籍辱崇禎己巳之變范撫軍入援公湊粟五百餘石犒師嘗割腴地數十畝代合族貼軍其仗義急公類如此當太常發金花落職復從高陽相國督師渝水人皆爲正慰且危正獨掀髯長笑曰臣子不當如是耶持祿養交非吾子事且如先侍御抗言大節何迄太常殉難猶毅然曰得其死矣世受國恩可惜此以報九廟之靈亦復何恨觀此則其自處與爲子處無論富貴于生

死又何如也正嘗擁五世于一堂人倫之盛海內寡二  
後以化麟爲父叩闕悴死終不勝鬱痛以歿海內聞而  
悲之乃某猶不能無感焉某交伯順四十年於公爲猶  
子乃不督過若以孺子可教也歲時風雨譚塵碁枰對  
某必色飛卽忿怒激切時某徐出一言無不立解不知  
何以得此于公也後子孫相繼殞歿公病以及屬纊某  
無一時不侍左右屢欲爲傳顧感痛不能搦筆久之始  
聊述其槩如此亦承公之素命也

鹿忠節公傳

鹿善繼字伯順號乾嶽直隸定興人祖久徵御史以諫  
言謫父正逆閹時傾身急去魏諸公難所謂鹿太公者  
也善繼端方謹懿巋然如斷山少以祖父爲師小章句  
薄溫飽讀王文成傳習錄而契之慨然有必爲聖賢之  
志每與同儕談說經旨曲折盡變動中妙理同儕謂其  
能記憶也善繼曰只是要醒得如何要記得醒得如何  
是我則由我而周程而孔孟而湯文堯舜無不覲面以  
相質六經四書皆我註腳夫豈有疑於心乎自是而論  
交日盛萬曆丙午舉於鄉癸丑成進士與吳郡周順昌

襖被蕭寺雞鳴風雨以節義相期勉選戶部山東司主  
事職鹽法與同舍郎某爬搔利病洞悉源委丁內艱毀  
幾滅性歸而遠邇來學者舍不能容隣居僧院幾無閒  
室服除補戶部主事署廣東司事遼左方闕餉善繼輒  
發金花餉遼神宗震怒得謫一時省臺諸忠直大列無  
不爲誦言者解官歸門人日益進每拈尋樂大旨爲及  
門談柄光廟御極首復其官典新餉廉直介立清操絕  
俗尋改兵部職方主事題覆章奏時遼陽初陷中外洵  
洵善繼爲大司馬草疏請建某斬某以俾國法會王象

乾以大司馬行邊因用廢弁與職方郎耿如杞左職方持之力首揆葉福清有司官不得違阻之旨善繼上書福清曰邊疆之壞由於債帥中外諸貴人入其債而請求於職方職方自愛其官不得不徇諸貴人之請今幸得一憂國奉公不徇情面之人反奉不得違阻之旨胥天下以職方爲市永無不債之帥者自此一言始勿謂能違阻之司官爲易得勿謂去能違阻之司官爲小失也清福謂其刺已也怒已而屈服焉歲壬戌孫高陽以閣臣理部事請寘逃臣熊王於法善繼舉手加額迄高



陽自請督師善繼請從適吏部缺司官羣欲挽善繼善繼不可曰軍中無苦樂但問所從誰相公一日在師中某當一日在幕中高陽嘗云予居東拓地四百里敵退七百里無一不出伯順經畫而口不言功功亦不及僅以久次轉員外陞武選司郎中而忌高陽者百計阻之遂與高陽同歸家居四年學力日充痛除將就冒認影響浮游之病而一言一動觸處逢源說約一編日與同人諄復口授崇禎初御起爲尚寶司卿無何陞太常寺少卿管光祿寺丞事細大兼司到處修明職掌未三載

復請告歸先是神廟末年高景逸二馮少墟鄒南皋講學  
京師同志者邀公聽講既而聞相戒不言朝政不議職  
掌公曰離職掌言學則學爲無用之物聖賢爲無用之  
人矣遂不往後數年與景逸偶遇於朝房辨析疑義景  
逸恨相見之晚具疏薦佐高陽而予秋七月東兵破定  
興是時公移疾江村無城守之責毅然于望風奔潰臣  
節之掃地也援兵登陴死守七日而城陷東兵挾刃逼  
公公不爲動遂死之當事者以殉義聞詔贈嘉議大夫  
大理寺卿廕一子入監讀書專祠賜謚予祭葬生平應

事接物一意認真學以認理爲主而言理卽在事上故  
其言曰讀有字書卻要識無字理則其言得可知矣所  
著有四書說約認真草三歸草若干卷行世子化麟舉  
辛酉鄉試第一伏闕頌父忠不勝喪死

歲寒老人曰公之死也以節著人謂足見公而予四十  
年交公知公之志知公之學方與公定交忠愍祠下固  
慨然有殺身不悔之意登第後遺周忠介詩有云寰中  
第二非吾事好向椒山句裏尋猶津津以節義共勵至  
榆關四載出入戎馬之場病苦死生只家常事蓋認理

明徹故能全體通靈孫高陽哭公云予向覘伯順之一窮通齊得喪忘毀譽渾成虧也乃今親覘其不二死生乎此言蓋得於目擊心識之餘意密神傾之後公真聞道之士也歟恤刑郎胡向化疏云善繼生爲理學名臣死爲封疆著節視居城中城破而不得死者不同時以爲知言

### 范文貞公傳

范景文字夢章號質公北直吳橋人萬曆癸丑進士初授東昌府推官獄多平反時值歲饑條荒政躬自賑恤

全活以萬計已未擢吏部郎一時正人多所推用甲子  
逆閹竊柄景文典選一疏詞義侃侃大略言天下仕路  
舉國如狂嗜進如鶩毋亦衡鑒之地先自不清而欲其  
恬漠寡營詎可得乎竊念除者有歲格其久近不得而  
私也遷者有資勞其深淺不得而私也特擢者有勛望  
其高下不得而私也今與需次諸臣約一行請託臣不  
能爲之諱又與同事諸臣約一聽請託亦願需次諸臣  
勿爲臣等諱以天地人才爲天地惜之朝廷名器爲朝  
廷守之天下萬世是非公論與天下共之人還其人我

無矢我此臣心可自信時魏忠賢黨羽視吏部爲外府  
疏出大恨之景文一日閱選人姓名齒舌本噴血漬地  
類中惡者遂請急歸父永年爲南甯守謝事居南都豫  
告所知曰吾子必不爲貂豎作奉行吏勅家人掃徑以  
待未幾果歸丁卯起太常寺少卿不赴崇禎戊辰冬再  
推補己巳七月擢右僉都巡撫河南拯溺救焚所至問  
民疾苦鼓中州之士氣以壯國威旣而邊人不戒薄我  
京畿景文聞警卽率師勤王宗社借之以安上使人慰  
勞之加兵部右侍郎團練通州壬申內艱歸甲戌起南

右都御史掌院事乙亥陞南兵部尙書凡四年廉辨以  
率僚屬公嚴以杜干請南額兵八萬人堪戰者不滿萬  
景文蒐軍實詰戎備部曲壁壘煥然一新嘗謂非戰無  
以爲守非守江無以守陵守京非守江北無以守江南  
此守江南之大局也以池河衛關山以關山衛滁浦此  
守江外之大局也宿重兵於廬游兵出英六之間東據  
鳳泗西應皖楚南控江北扼淮此守江北之大局也景  
文以世道安危爲已任故爲綢繆之計壬午八月轉北  
刑部尙書十月改工部甲申二月入政府拜東閣大學

士海內望治甚殷爲日無幾天下事已不可爲矣逆闖  
犯京師景文三日前卽不食城陷號泣拜闕投井死或  
以初入相而魏通州陳井研據其上者非同心之人未  
能行其志有遺憾焉生平重氣節篤友誼當周忠介順  
昌以忤璫逮景文出橐金二百急其難金至而忠介死  
詔繼景文復給其孤寡孫文正承宗鹿忠節善繼皆氣  
誼最篤兩公殉難後爲梓其遺集景文所著有味元堂  
稿南樞志大臣譜武功編體仁編開心劄記有子早卒  
遺文淪喪寶錄亦多缺遺贈太傅謚文貞



歲寒老人曰甲申三月神京陷宰執而下殉難者二十餘人畿輔人與其難者六公其首也余與公相去僅三百里未得識公之面然公在南樞曾有檄聘予爲北司空又欲疏薦於朝余雖未就實於公有知己之感也窮棲他方未能得公全傳殊以爲恨然日月經天有目共睹固不俟余詳言之矣

金忠節公傳

金鉉字伯玉先武進人後籍順天少有慧質讀書目數行下天啟丁卯順天鄉試第一明年成進士乞教授爲

讀書地授揚州教諸生先德業而後文藝燕居言行俱有規格諸生凜凜事之若耆宿轉國子監博士辛未陞工部主事命修理安定四門軍器時中官張彝憲總理戶工二部錢糧令建公署侍郎高宏圖罷去憲向諸司官索儀註鉉疏力請止之謂廉恥不可不維浮費不可不惜公署旣建勢必強司屬匍匐於獨踞之庭卽諸臣矯矯自好當亦不爲內臣屈而其中保無暮夜多慚寡廉鮮恥以自行其私者乎不報彝憲上任移檄令兩部司官行謁見禮公具監臣移檄非體一疏極言彝憲亢

顏昧心妄自尊大以皇上廸簡之臣子而令其磬折僂  
僂將置自有之堂屬別行誣妄之儀臣委質聖朝自矢  
無玷斷不敢匍匐刑饒之庭致罹交結之條也得旨各  
官遇有職事相關自當禮見其餘不必通謁彝憲益銜  
之適部差抽分杭州鉉告病回籍彝憲以驗放火器炸  
損誣參竟落職鉉有自訟一疏閉門讀書究心物理性  
命之學悉取五經四子書暨諸儒語錄研思博覽毛詩  
春秋周禮俱有解於易更有所窺有悟卽節記之嘗言  
善易者不譚易也劉宗周爲少司空嘗就鉉論學與陳

正史可法朱之馮道德經濟互相勸勉鉉貧約自甘  
所居不蔽風日中外有以起廢言者鉉絕不問讀書之  
外輒靜坐每謂人曰人苦不學學則未有不日進者性  
至孝父病衣不解帶者數月辛巳父卒於丹陽號泣奔  
喪僅存皮骨癸未當路交章推轂得旨起用銓部卽欲  
啟事鉉以服未闋力辭甲申二月三日服除四日卽補  
兵部巡視皇城職司禁門守軍先是皆中使虛冒鉉下  
令嚴禁代者懲不到者革中使畏其剛直相戒勿犯逆  
闕勢迫陷大同鉉疏請撤宣府中官監視恐於中掣肘

不無僨事之虞。尚任撫臣。必賊騎不敢窺宣。也不報。未幾內監迎賊。宣撫朱之馮城頭。盡節。鉉聞馮殉難。擬疏請聖駕南遷。以時迫不果。謂其弟曰。宣鎮陷。都城不守矣。我死分也。惟無以處母。目不瞑。弟欲奉母隱。母不允曰。我受皇恩。爲命婦。決無生理。宅中井可入也。城陷。易朝服拜母而哭曰。兒職在皇城。他非死所。趨至御河。邊賊已入。鉉指賊大罵。解牙牌付長班劉元。向關拜元。牽衣不釋。鉉髮指目裂。以手捶責衣冠。躍入水中死。母章知鉉殉御河。卽投井死。妾王氏從之。弟諸生銖城陷。

自縊爲家人解救痛母兄殉後數日亦投井死鉉尾  
不可復識弟鏡僅認髮與網殮以衣冠葬於御河邊贈  
太僕少卿謚忠節母贈恭人仍建坊旌表鉉殉難時年  
僅三十有五生平弱不勝衣訥訥然如不出口篤志力  
行不蹈文人之習氣節士之矜激處困能亨在險能動  
而義之所在有千萬人不可奪之志眞所謂學道人歟  
有宋儒四子合刻行世歿後仲弟鏡梓其遺集八卷  
鼓寒老人曰余甲戌初識公公被放里居時也座談之  
際每事嘗思退云易三百八十四爻未聞有退凶者閉

戶十二年讀書窮理甫起官卽以致命遂志人遂以爲  
節士不知理學忠節未始有二不窮理而甘蹈白刃者  
有之未有能窮理而不能致命遂志者也吾鄉理學而  
忠節者公與鹿伯順也鹿之學近陸王公之學守程朱  
至居敬致知四字又能發程朱未發之蘊聞朱勉齋嘗  
與公論學曰盡人倫體天理公極服其知要公之自得  
深矣

賀公景瞻傳

崇禎甲申二月二十二日逆闖至獲嘉原任武德道兵

僕賀公同妻恭人王氏妾李氏張氏死之公名仲軾字  
景瞻衛輝之獲嘉人四世祖雄以典膳起家雄生春春  
生國清國清生盛瑞字鳳山以進士歷官參議爲營部  
郎以清直著是爲公父仲軾少而近癡嗜讀無他好當  
重九日鳳山令家僮攜壺榼導之出游酒斟食設一無  
所顧及歸鳳山問故曰偶拈一題遂忘登高耳夙有疾  
鳳山深憂之仲軾三年居宿于外絕葷酒疾得瘳癸卯  
二十四歲舉于鄉庚戌成進士甫釋褐具疏批鱗忠直  
之氣中外欽仰初授陝西醴泉令邑故刁悍里胥作奸



力清錢糧諸弊分較秋闈稱得士以外艱歸

戶外事一無所問服闋補江南青浦縣青冠紳

牘無虛日誓不以法假人江南故有投獻之弊因下

曰田歸紳士役仍本人請者紛紜槩謝不應征比錢糧

不煩輟筆訟牒卽令本訟人刻日追呼監司臺使者至

不飾廚傳供帳文學孝秀季有試月有會漕粟官民屯

悉貯于倉粟糶雜責在民耗抑勒責在軍軍與民兩得

其平暇修樓櫓葺橋梁爲海忠介新祠宇禮逸士陳

公在諸要人右庚申陞刑曹主事具疏訟父鳳山

是鳳山爲繕郎經營乾清坤甯兩宮力塞漏卮杜絕請  
託不二年以銀六十八萬竣役實省在庫銀九十三萬  
其嗣任繳奏前費以一百二十萬皆取羨秩去而鳳山  
竟爲異己者中以考功法仲軾據實奏辯得旨下部雖  
爲忌者所抑然公論已明癸亥遷員外隨陞本部郎中  
戶部太倉老庫失銀主者直參前任湯道衡奉旨逮訊  
仲軾以茫無確證具疏駁之湯得釋是年冬遷鎮江守  
治郡事一如治青浦巡漕御史駐鎮運船不敷漕使者  
欲分派諸運船弁借口船重恐有沈溺仲軾曰該弁恐

妨私貨耳運糧美差也但下令有敢任酒派餘米卽行  
更易領運漕使如其言無復有作梗者先是黔中用兵  
募鎮弁有能運餉至黔酬以衛印指揮戴天錫先往竣  
役而衛弁持印不讓出令者置不問仲軾曰如此何以  
信後立主前議後鑽刺者多方夤緣屢借上官爲奧援  
仲軾具文力爭曰天下事遇難苦則能者職其勞遇安  
逸則狡者享其利才知之士所以吞聲而天下事卒至  
不可收拾甯直爲一戴弁地耶上官竟不能奪丹陽姜  
志禮以忤魏黨罷歸一日部劄逮趙彖宰南星招中并

無姜應勘問而尾後止書姜志禮三字院檄下道行府  
提勘仲軾曰姜係四品京堂不奉旨誰敢擅提具文回  
道道嚴駁仲軾曰固知不行提必得罪然以此獲罪所  
不敢辭若今日奉時局異日者以擅提四品京堂加罪  
罪將何辭擇禍莫若正守之不移丁卯陞陝西西甯道  
兵備因爲璫賢私人所銜劾奏草場變價有負厥臣急  
公之意鐫級不果行辛未家居作春秋歸義至諸撰論  
翻駁古今成案獨伸胸臆所欲言壬申寇警日迫捐穀  
百石爲修築置械器癸酉三月寇薄城日宿學宮爲自

靖之地忽有武德之報所屬二十城交際一絲不受道有三營兵馬痛懲積弊勵精振刷嚴沙汰利械器信賞罰清占役積其銀爲買馬置火器後敵薄城所賴以制禦者卽其所備也御史袁化中同諸忠死逆璫久未葬仲軾捐金爲襄其事未幾聞曹郎有指而訾議之者仲軾卽拂衣去歸家課弟姪閉戶著書甲申二月寇氛相逼所在納款仲軾撫心太息比僞官到縣欲置賊死姪每素曰旣無官守何如詣闕直陳死君父前因攜家抵石駝莊曰恐路梗不能遠死小盜手無益復歸至合河

僞官要入城仲軾大怒擲帖於地曰賊敢見我乎謂弟  
姪曰道二仁與不仁而已矣出此入彼事無騎牆一生  
功力在此一日吾今得死所矣復到巨栢莊祖居具衣  
冠北向拜闕繼登塋辭祖考題齋壁曰吾家自典膳祖  
以來受朝廷恩厚及今一百七十餘年國家一旦有急  
不以死報何以對吾皇何以見吾祖考况河北千里名  
區豈可無一殉義之臣妻妾輩余不忍手刃願從死者  
共彰大義隨吾同墓不願者亦不强也卽登樓呼童取  
酒與弟姪輩談笑自苦復手書今日方知賀景瞻促弟

姪下樓扇戶縊於東間梁上北向對君也妻恭人王氏  
西向從夫也妾三人俱縊於西間梁上以次東向侍主  
也是日天忽晝晦烈風折木伐屋人以為忠憤所感云  
歷三晝夜顏色如生偽官亦驚嘆羅拜時年六十五里  
人私謚為文貞先生所著有栢園初草冬官紀事春秋  
歸義八卦餘生等集共八十四卷子敏猷廩生入太學  
先公卒嗣孫振能能讀書後中丙午科舉人

歲寒老人曰余嘗竚列邇來忠臣隕身於魏璫者自楊  
忠烈左忠毅而下一一可指數也甲申天子死社稷致

命遂志者范文貞倪文正而下一一可指數也然楊左  
諸公被逮下獄范倪諸公國破君亡義不容苟生勢無  
可逃遁只有一死以報君父若公旣身在林泉微箕靖  
獻于身前夷齊槁骸于事後亦無不可乃矢志就義妻  
妾同殉急遽不違禮殆與劉蕡山若合一符可謂善處  
死者矣總之仗節殉義之臣須具一知中之愚仁中之  
過方得淋漓足色彼仁柔者悠忽不斷知巧者規避多  
端一瞬失之終身莫贖從來坐此咎者正自不少公策  
死之道可謂仁至義盡矣



張公元美傳

元美名羅俊直隸清苑人性端毅尙氣節居恆以綱常名教自勵幼娶雙瞽女敬好無間言不置媵妾諸生時弟羅彥蚤通顯羅俊淡甯自守刻勵古行崇禎丙子魁于鄉絕不事干謁不阿權貴事不苟一時之便凡三黨事悉倚之癸未成進士以觀政給假家居甲申聞逆賊李自成擁數萬衆入太原破甯武由居庸而北所過城邑紳吏皆望風降羅俊憤謂弟羅彥曰吾等何以報國恩事急矣當堅守保定遏賊勢以蔽京師不則甯以死

殉國臣子之義也賊將劉宗亮犯畿輔過河問將嚮保定羅俊數月前傳檄首倡効死勿去之義忠憤之氣感動全城乃分雉堞嚴號令守浹月益堅至三月李建泰兵入保定其卒爲賊來說降羅俊守東面手擒之以示衆賊自城下曰京城已陷守城何爲時京城陷已五日矣羅俊不聽鼓舞益奮賊攻益急至三晝夜賊焚傷死者愈衆忽建泰與賊應西南城陷賊乃入羅俊猶力守親擊一賊仆地扼賊之吭嚙其面竟嚼一耳血淋漓口角間大呼曰我乃明進士張羅俊汝等所罵霸城者吾

弟羅彥也賊擁眾亂刃死年五十一子伸庠生適他出  
聞倡守來奔其禦賊城破卽投井死年二十六

歲寒老人曰公甫成進士卽以身殉爲諸義烈冠忠矣  
至孝於親友于兄弟與瞽婦相敬無違禮門以內何雍  
穆也丁丑公車與予論交侃侃多氣誼斯人也殆所稱  
完名全節之士乎

### 韓氏二世祖傳

宗法之廢也久矣本是同根漸成行路此仁人孝子之  
所爲撫膺而嘆也韓子參夫銳志復古宗法講明獨詳

欲於山中覆草爲堂以奉其祖考使子孫世世守之勿墜可謂特立獨行之士矣余知參夫力學久意之所是舉世不能撓大都所言所行與所取之人事惟期於盡倫心惟約于勿欺後盤桓于南國者數年從高景逸先生遊其學益礪今過余以其二世祖考妣傳相託竊聞古來賢人輩山人重其賢併重其先爲賢者之祖聖人輩出人尊爲聖併尊其先爲聖人之祖是所謂守身不辱光及祖考彼大奸大兇不獨身爲戮民而且令人追恨其所自出則先世之或榮或辱祇在子孫之猛爲修

耳雖有祖德不能庇不肖之子孫卽無前功豈能掩拔俗之後嗣是子孫之託廕于祖父者闕猶淺而祖父之惜衍於子孫者權更大耳仁人孝子宜何以爲情耶韓氏世代已遠生平顯晦俱不可知參夫之言曰不敢以不情之事誣先世也但記姓名而已嗟乎今之爲誌狀者強爲粉飾盡塗面目子孫亦何貴於此哉韓初真定之藁城人後遷宛平祖有諱四公者配馬氏序以序之四公乃行四也是爲參夫之二世祖云

仇孝子雪廬傳

孝子名雲慶字騰宇雪廬乃劉參議兌因君雪夜居廬  
題以贈君後人因而稱之者也始祖貴乙自揚州移新  
安五傳名鐸是爲孝子父母耶以孝聞載入邑乘孝子  
家固貧事父母曲盡子職父性嗜棗君每遇輒懷歸以  
獻母年老多病每夕焚香籲天願捐壽以益母母病尋  
愈萬歷辛卯父母各九十歲相繼終孝子痛幾死而復  
甦葬之日結草廬於墓側時洄寒雪深尺餘寢苦枕塊  
哭奠如禮負土築墳手植松柏足跡不入城市者三年  
墓之西北隅號曰鬼市與廬僅隔數武夜半悲風四集

怪鳥弄舌野狐呈態燐火往來籬下孝子絕不爲動三  
年如一日也邑令羅君啟先聞而敬之親造其廬具爇  
當事得旨旌表居廬時年近六旬矣禮稱不毀孝子不  
飲酒不如輩不御內倍嚴于少年時親知有勸之者曰  
君無嗣且乏應門之童熒熒家室何以爲情孝子曰我  
正以二親內未寒而恬然家居安妻妾之養此則情之  
所大不堪也遠邇名公贈詩百餘首皆焚毀不以示人  
然不求名而名益彰無問遠邇孰不知雪廬孝子哉孝  
子被旌在萬厯乙未府道申請部院查覆孝子絕不知

劉君兌仗士民公義而成其事嗣巡撫王君紀月給米一石巡道解君經邦月給米四斗當不減劉殷七年之粟矣孝子溫雅平曠行不苟合言無夸矜無少長貴賤莫不驩然相得而孤介之性偏與淡泊爲親嘗連日不舉火絕不向人道並無顛顛色其自得深矣居庠數十年以色養二親不求仕進然善誘人從游者多所成就復善書老而彌精七十生子九十見孫一日無疾而逝壽九十三子爾顯女一適花似錦亦以苦節聞

孫魯章傳



孫魯章名含高陽人愷陽先生第四子也余初遇於鹿  
伯順坐上以其貴介常若避之舍獨於僊任之中偏若  
就之伯順謂余曰相國衣盍端在是人不可棄也因而  
定交焉丁丑與君仲兄鈐同上春官時蘇奸民張漢僊  
以烏程意臚錢虞山風影事投揭長安且上疏已得旨  
逮矣鈐固善虞山日夜思爲之地時伯順子化麟亦以  
伯順殉難叩聞得其揭帖一冊卷首有假曹司禮令其  
上疏之辭余謂鈐與化麟曰決非司禮所願受也二子  
曰孰可以爲司禮語者余因以其事語中貴劉惟善曰

人借司禮殺人而司禮不知君不可不知也劉素自好  
每慨然有志於古之璫而賢者因問其詳余出漢儒揭  
帖示之惟善亦曰此定非司禮所願受也翼日惟善復  
來曰昨所言已因人悉之矣繼而茅元儀亦有字遺余  
與鈐兄弟謂虞山旦晚且至屬其蚤爲計鈐令含就商  
於余爲言欲與化麟同謁馮涿鹿余曰謁涿鹿可而增  
一人則不可蓋兩相國家報謝往來情意稠密不妨相  
機婉言參一人則易涉門面矣以江村與涿鹿雖年誼  
而無交情也時虞山有人過張果中含急就果中探動

定遂謁涿鹿涿鹿坐語移數十刻殊不爲動但頻呼茶  
且曰僕於東林諸君子不遺餘力諸君子肯一言相容  
耶含曰不然左浮邱先生墓銘家相國秉筆新參之力  
一段東林諸君子大家感激有字稱謝何謂無一言相  
容誌文具在歸卽呈覽蓋虞山因新參一段有字來屬  
削之含遂借言謝之耳涿鹿遂毅然許爲之地適虞山  
將至都含與涿鹿逆於三家店含從虞山入都遺余字  
曰晤涿鹿坐語數十刻始得其首肯奉教而來幸不辱  
命曹司禮以惟善之言與涿鹿相合遂疏謂我揭自有

接本衙門在何嘗令之上疏漢儒柳死旋逐烏程是役也脫虞山之阨者涿鹿也而作涿鹿之合者含也含具幹略能詩文負過人之才而未得表見于世六載榆關風浪艱險贊襄之力爲多卒從其親殉城而死君子曰含可爲孝子矣

鄔孝徵傳

孝徵名萃號慈菴湖廣石首縣人二歲失恃乳母哺養繼母視如己出甫成章以孝聞家饒無私蓄與其弟藩友于甚篤由是父母愈歡愛之初就外傳卽以聖賢爲

必可學而至其師孝廉陳纘宗大異之後陳仕於燕萃  
從遊遂入籍充博士弟子員試輒高等食廩餼督學滄  
嶼左公較士萃與史道隣齊名一時稱得人萃因交史  
共朝夕二十年如一日性好學尤好誨人執贄請益者  
戶常履滿若死難宣府朱之馮出其門其他可知也所  
與遊亦皆名俊北如金伯玉南如管待菴咸素稱善十  
困棘闈兩經旣售而別意淡如也居恆兢兢力學其題  
齋聯云一失足爲千古恨再回頭是百年身以此自警  
待菴見而嗟嘆之又輕財好義多方濟人之厄如荊州

運糧指揮馮衍祚以七十艘糧抵京沿途消耗幾四千  
餘石所司巖比危在旦夕萃與渠僅一識面耳頃橐周  
之前後仍貸五百餘金無何衍祚病故萃復親爲收殮  
送其骸骨並僕人雷性南歸所有債負置不問岳州人  
張正昇有孝行曾割股愈其母萃高其行因與爲友後  
正昇居京師缺費貸萃百餘金未收券正昇忽聞母赴  
以金未還不敢言歸萃曰君遭此大變豈可爲負債而  
不奔喪耶正昇感泣而別其義氣慷慨類如此崇禎朝  
司訓新安日與多士講習不倦學宮傾圮煥然新之萃

有傲骨遠識晚更得力於禪邑令某委以糧務初厭其瑣屑繼而邑令督責其書役萃曰學博豈司倉吏耶曠然納其冠服求去邑令謝過留之甲申僞官李邦興假都同巡行地方以射利郡縣不敢問萃一見謂諸士曰京相也吾目中閱此熟矣語侵之邦興不敢逞其威果至寶坻而敗鼎革之際萃鬱鬱不得志竟以此致病沒於學署子孔彰南歸不及視含殮囊僕鄔知文理喪葬頓闕邑感德請從祀名宦方余寓遼城與萃僅隔一壁時時促膝語中懷事居然有一夕十載之意焉

其門人蔣生如蘭每語其行事未嘗不泣下沾襟則其  
教澤入人之深可知矣嗟乎人亦惟其生平耳志固有  
所不得行方君與史管金朱諸君子遊其志可知也而  
厄於時及其鬱鬱不得志臨期嗚咽殆矣而不忘諄諄  
之語是其志諒不可沒也余用述其梗概以告君鄉之  
賢士大夫使知君生于楚非徒生死於燕非徒死云

殷仲宏傳

仲宏名淵直隸雞澤人少負奇耿介自持性孝友事母  
唯唯訥澁若不出口於父則侃侃辨論必理至心警然



後已曰慈幃家務食飲而已過庭則得失成敗名行關  
焉何可不辨於兄更効切劘知無不言言無不盡父兵  
備闔南死非其罪淵兩疏鳴冤不報未幾闔賊席卷秦  
晉延及三輔淵長劍號曰卽不死留此身以待用也今  
先子之讎已矣苟且與賊共生奚爲四月聞國變謀諸  
邑眾爲先帝發喪痛哭文廟作討賊之檄以義自憤時  
自成僞令秦植猶假狐擁眾手刃淵于明倫堂時五月  
十一日也

歲寒老人曰殷仲子真義士也哉死而非義未免沽名

且以傷勇仲子父死以闖賊陷兩藩主兵者畏罪假違  
令失道卸罪於人以道己辜則仲子于賊不獨爲殺君  
且殺父故以頸血寒逆賊之膽豈暇計成敗禍患哉作  
詩明志諭意於其妻令絕食自盡且問兄意云何兄曰  
吾未嘗受祿於朝且嗣續未立如先人何仲子曰此借  
口弟不及此矣噫予固憫其言而悲其志仲子真義士  
也哉

李完一傳

三台爲元儒劉靜修先生風化之地今雖代移世遠而

流風遺韻尙存巾裾韋布間余五十年嘗往來其鄉猶及見劉鍾所先生習聞三皮堂之盛嗣後表表蔚起者不可一二道也吾友完一李君實生其地少馳驚于文場長浮沈于宦海老而困頓寂寞且竟以他鄉死矣跡其生平不爲卓絕崖岸之行不慕矯激奇異之名惟以忠信文章孚里閭間無論少長賢愚皆曰吾完一先生之人之文也今雖死言念夙昔實可傳也君姓李氏諱衷實完一其字也先世口外小興州人永樂間奉詔內徙居新安之三台里世業儒君生而聰穎讀書過目不

忘族兄孝廉孔從以學行爲鄉所推君師事之銳意進  
修靡間寒暑十七歲入邑庠每試輒高等大有聲諸生  
間鹿忠節公倡道江村君與族弟童負笈從之遊忠節  
公嘗向人曰完一可言文章蔭繩可言春秋蔭繩卽童  
也天啟辛酉左忠毅公光斗督學畿輔覃恩當選士充  
太學得君文深嘉賞爲得人慶都尉王君慕之延爲弟  
子師高陽孫文正公見其文曰此非庸人也君有至性  
事父母言動唯謹居喪哀毀若不勝母有兄弟貧不能  
自存者君資其生理與別駕劉勃然友善劉病歿母老

無依君迎養久而不衰張茂才某病劇以子類錫託君  
君視之若子類錫得爲諸生又能鼓舞人文一時知名  
士如崔九圍李順昌等皆師事之後進之士執經問業  
者履嘗滿戶外順治初授徐州通判官雖卑公道所在  
能毅然任之大參張君重其品行不待以屬禮嘗以官  
評相屬君不敢稍涉已意用巡方薦陞荊門州同知職  
嵒漕務飛輓獨先有嫠婦張逋官糧鬻女三十金以應  
君傾俸金代償使爲母子如初視荆山篆力絕羨耗金  
不兩月一歲之正供民爭告完去之日荆父老皆流涕

攀送焉陞四川順慶府通判至卽以老病乞休歸途跋涉重繭僅一蒼頭兩蹇而已次漢中囊洗不能前遇參議董君應徵素知君遣力送之里門家居七載食貧力學以病卒年六十九君生平不治生人產以教授爲業家計用裕於義所在必樂赴之當庚辰歲凶君出粟數十石爲粥以濟餓者容城蕭姓貸銀三百兩不能償遂焚其券在順慶所屬彭溪令師覺先聞艱不能歸君解驂贈之後覺先爲保定同知君從無一字相干恬淡靜穆無他嗜好獨癖吟誦至老愈篤嘗爲詩文走筆數百

言立就不深思不苦吟見者皆服其敏自無機心絕未嘗以詐僞逆人無少長皆信之詩文稿多不存

歲寒老人曰完一與予弟啟美同爲忠毅公所選士交好且久當忠毅被逮時予與鹿太公礪金急其難君首出硯耕所得金應之君殆讀書而知大義者也故其學問領袖一方然竟厄於一第雖老年稍稍見用終未大有建豎人皆惜之

李逸士傳

逸士名童字蔭繩新安三台里人也少有俊才師事鹿

忠節伯順爲高弟子甲申後歲貢在曉逸士投牒於學  
攜妻子移居成安父子以教授生徒爲業越十五年困  
頓而死諸子自傷貧窶不能歸輟泣下汎瀾余謂之曰  
汝知而父之志乎老死他鄉卽所謂求仁而得仁也夫  
何憾諸子錄其生平哀乞立傳知逸士者莫余若烏儻  
祖夢龍歲貢廷試第一行誼爲宗黨所推父祚熙邑庠  
生勇于爲善子四長埜中萬厯己酉鄉試仲臺季堅逸  
士其叔子也從伯兄孝廉學循弟子職孝廉病侍榻晝  
夜不解帶壬子十九歲入邑庠未幾父母兄弟五年之



內相繼而逝逸士熒熒一身拮据悲苦幾不知有生然  
棺衾含殮猶能如禮家由是益落唯讀書益勵每至午  
夜不休丙寅食廩餼督學袁公署其牘云索解欲窮其  
原撰辭直透其頂賞踰常格甲子問業鹿忠節于江村  
丙子忠節殉義逸士號嘯數日日天奪吾指南也傳習  
師學較侍師時倍爲真切三台爲靜修先生設教地逸  
士於書院中建茅屋三楹日誦讀其中祠宇荒圯倡同  
人捐貲營理丁亥攜家南下至廣平之成安愛其風氣  
醇朴遂于栢寺營居焉每爲人講解忠節說約一編遠

邇士執經問業者無虛日肥鄉賀應旌造廬而訪檄諸  
士有云新安李先生學衍陽明益傳忠節吾儕所當心  
服而儀型之相從者五十餘人已亥過蘇門新鄉郭士  
標傾蓋投歡令子姪問春秋居一載忽病病中猶講論  
不輟稍瘳歸成安意欲終老蘇門忽病不起親友問疾  
者有憂色邇士笑曰出門以來死于溝壑吾志也今復  
何憾邇士少豪舉酒後悲歌有燕趙風中更家難益自  
刻勵嘗留心經濟間習兵家言迨其後邱壑自適嗜學  
愈篤嘗云老而不學便衰故隨地接引倡師學于趙衛

之間門弟子隨錄問答之言曰讀書歸要喜談節義事  
激昂感慨意常有餘每與地理家談議論風生若有獨  
解也卒年六十有八友人杜越誌其墓子姓姻譜詳載  
誌中三子體天合天明天皆奉逸士命從余遊能讀書  
繼父志

歲寒老人曰傳稱逸士者以其不係籍於士而欲遺之  
遺所以成其逸也遺其名正欲逸其心也夫世或以顯  
達而死或以阨塞而死者多矣而求之於心果逸乎否  
耶士必先遺聲利而後能逸遺聲利矣稍有憤激于貧

賤之念而心已爲貧賤所役是亦不得逸也逸士當出門時固以不忘溝壑爲志卽死貧死旅心安往而不逸哉蘇門以貧旅死者有新城張果中以熹宗恩選士四十年不謀一官困窮阨塞以死蠡縣諸生彭之燦恥爲苟食竟餓死于公和嘯臺逸士嘗往來蘇門遇兩人之墓低徊憑弔不忍去嗟乎是可以知逸士之心矣

### 郝涿川傳

郝公名勲字孟立世居涿之房樹村友人汪湛一題其廬云月窟天根眞隱處水田山色小江南人故稱爲涿

川先生中嘉靖丁酉鄉試絕迹城市有司罕見其面刺  
史岳憐其貧嘗寓書以示請託勲若不喻其意者岳極  
嘆其可仰而不可卽有某以大獄株累貽銀器一案求  
脫勲弗顧友人謂是人誠非其罪爲之排難雪冤豈非  
濟物之一會乎勲乃翻然援之而終不納其酬素與同  
郡田夢鶴爲貧賤交田後爲中州副使贈以廐馬勲力  
卻之曰我有朱游之車可乘正無需此其孤介類如此  
家雖亦貧見寒者則解衣相贈性尤和易有惡少嫚罵  
於門勲曰醉耳絕不與較萬厯朝銓司張特疏以賢良

聞力辭不赴爲舉人四十八年卒年七十二著述多遺  
失僅有川上存草勲曾促膝老聃割南園地爲三清廟  
人遂以方外異人目之姚江謂儒佛老莊皆吾之用勲  
殆有用於老莊而不爲老莊用者乎素與孫淮海羅念  
菴爲友輓章有云論理學而返本窮源淮海並推爲獨  
步闡性術而搜懸剔隱念菴亦幸其同心可想見其生  
平矣

歲寒老人曰熹廟以後其隱也易神廟以前其隱也難  
蓋璫歛薰天逆闖肆虐道中之貧賤人知甘之若河清

海晏士子一登仕版遂自謂係籍聖賢以安富尊榮之時能不去非道之貧賤者曾有幾人涿川四十八年無一念忘溝壑非塵視軒冕芥視鍾駟者能如是乎余恨與公生不同時伯順長余數歲猶及見於侍御公坐上亟稱爲拔俗之士乃身無血嗣國史不及家乘久墜豈公之高蹈於生前者并欲晦名於後世耶敬採所聞而爲之傳以俟君子考實焉

馬玉壺傳

玉壺名潔家世定興警愚先生仲子也性侗儻喜風節

諸生中咸推重焉與鹿忠節友善余識潔以忠節余以  
長子與潔結姻也亦以忠節忠節爲定興十三場籽粒  
地數千頃土瘠賦繁民不堪命五年心力請於上得折  
徵減地糧之半此永賴之利也潔始終贊勸之而潔實  
未嘗有尺地天啟時逆賢大修皇極殿取車於定興涑  
水新城人心鼎沸客氏邑人子其母佞佛潔授意於其  
門僧轉告車盡捐邑令缺委署者魏黨也令所私余州  
判視篆饕餮放橫勒日完糧商人衙役暨驃馬夫悉索  
見面禮抗者笞幾斃潔倡言於諸縉紳達之當道仍率



閩學具呈委署者怒挾璫勢欲中傷潔潔使聞於璫之  
要人以懾之委署者不敢動余遂逐已巳之變羣小乘  
機搶掠邑令某盲不修守禦惡聞警報百姓棄城走富  
商等語大俠王福安曰人心洶洶勢不能自有其財倘  
能防衛願與平分遂立約逸去事平眾欲薄酬王怒曰  
以性命易財詎可食言眾無以應謀於潔潔謂王曰爾  
禍不遠矣驚問故潔曰危亂時而眾以財託爾非慮他  
人卽慮爾爲禍端耳今事既定若以酬爾之物爲興訟  
之資爾能操其必勝耶奈何以身外物喪生平俠感悟

立焚其券不索酬邑西南爲巨馬易水河陽匯流於要  
津建橋梁二每歲秋葺夏埽吏胥叢奸居民苦之新城  
令沈君迅來攝篆會里猾以百金貨緣董其事沈疑之  
商於潔潔暢言其弊令拒營謀者別舉廉幹二人任之  
省民力而成功速復下令埽橋時封貯廟中乾者令民  
以溼易之歲爲例民大稱便丙子春部牒飭守禦勅附  
近郡邑城增高補厚踰三月者罪不赦邑令羅君四達  
懼違限造廬相商潔同紳士誓於神畫地估料不階官  
吏令士紳分任百姓鼓舞從事不兩月成是年秋七月

東事急邑令病守禦弛甚太常鹿公善繼家居江村潔  
與工部郎范文源走江村促之入城誓以死守城陷潔  
與鹿公俱死之繼配田亦以死殉嗚呼潔一諸生耳生  
以忼慨磊落雄里閭間終以大義激烈而死生平雖困  
於遇而能隨事利濟爲德於鄉鄉之人無賢愚貴賤莫  
不知其人亦可以無憾矣子四爾植爾標爾材爾楹爾  
楹終身不應試繇居四十年不再娶從余遊能勵志於  
學不愧其父潔死逾三十年余今且八十有四猶得吮  
禿穎紀生平竊以爲爲潔慰云

王念南傳

念南名介初名三錫字任軒念南其號也直隸曲周人父屏南文學獨善性剛直不諧于俗其鄰居宦也垂涎其產先以厚資餌族人以及屏南屏南堅弗售以是怒族人遂共羅織之屏南得禍不懼卒全所居宅其他蕩然也時介甫數齡親當其阨誓取科第以慰屏南父子俱無他技巧因貧竄特甚屏南棄世而母氏獨存或日止一舉火嗣又有欲得其宅者時雖貧賣田宅猶可作鄉間富人親友亦有勸之者介曰吾棄產不能見先人

于地下且命苟貧金入篋中一夫肱之走矣吾何有母  
氏亦成其志自失怙至登賢書十八年皆茹苦日也介  
性至孝不能具甘旨以和顏怡志悅親其不爲溝中之  
瘠者幸耳戊午舉于鄉母年且老性嚴急常一言不合  
輒喝斥介從無幾微見于色時神宦多鮮衣怒馬介獨  
十三年無帛衣布袍草履不識者不知爲孝廉也西鄰  
張老憐其清苦以鑲銀器一盒鄉間一小莊餽介介弗  
受蓋時之僅見者爲定興教諭課士暇一編自娛著任  
軒隨筆終任未嘗一字干縣令直指吳公阿衡訪時政

介以三策上首薦介俸甫三年遂有東平州之擢刺東平仍服學博公服補易白鵬帶以銀箔鍍之而已東平素號衝疲加以兵燹之後比屋流亡野多曠土徵收羨餘卽庸補正項聽訟款言化導從無金矢之入士民相安有來暮謠當道不惟不以責交際反有止用東平水一盃之語無何遂病投劾而歸歸則家猶徒四壁立也嘗謂人曰吾生平無快事惟守產不愧先人居官不負科目差足自慰耳未半歲而卒年六十一從祀鄉賢三子俱諸生體元體健體行五孫三諸生端方郅爾進士

鄰鄖承先啟後以文世其家者仲子也

歲寒老人曰念南司鐸范陽嘗於鹿伯順坐上習其風  
旨刺史東平偕鹿太公走孔林復過署中信宿迄今四  
十餘年矣體健訪余蘇門執贄而修舊好且鄰鄖連步  
南宮凜凜守先世清白迪後人儉素學莫切於是亦莫  
大於是因念公厚德發祥而余叨夙緣難忘舊好遂爲  
之傳

芝僊傳

芝僊名暉字爾敬山陰人宋儒尹和靖公之後幼讀

好弄十餘歲聞人彈琴遂悉心其學者十年性嗜山水  
愛諸名勝徧遊三吳八閩淮楚瀟湘之間印證琴學不  
啻如性命崇禎間天子明琴理延攬天下善琴者遂官  
武英殿中書舍人從上彈琴仁智殿上出御製五建皇  
極曲令譜之中有洪範風雷雨暘等詞滾拂劈刺曲肖  
其情致澎騰其要渺上不覺失笑曰僊乎僊乎卽賜號  
曰芝僊刊之印章一時傳爲盛事數年多所獎賚鼎革  
後芝僊浮蹤山岑水湄無以爲家晚年愛蘇門山水遂  
卜居焉間爲詩歌以見志刻有徽言秘旨若干卷行世



歲寒老人曰芝僊蓋今之逸客也余子若孫嘗從學琴  
因思聲音之道出乎性情通乎神明達乎國家天下明  
季上欲以解阜致天下之和蓋不得於君臣之間將以  
身乎取之禮樂百年後興事若迂而心則苦矣語云一  
人知己足不恨芝僊以一布衣受天子知遇洵非偶然  
哉廿就困辱追述前曲俾傳後世若芝僊者亦可謂不  
負此知遇矣

湯母節烈傳

湯母睢州湯子斌之母也母當崇禎末年逆闖肆虐所

至攻陷城邑母義不受辱罵賊死逾七年提學使李公  
震成檄守吏建祠睢州春秋致祭又十二年巡按御史  
李公粹然以疏聞表其閭曰生員湯祖契妻趙氏節烈  
之門子斌由翰林院檢討兵備潼關贈母恭人君子以  
有斌爲之子故又曰湯母云母睢名族父尙敬遠學篤  
行與湯鹽齋公交好時祖契方幼與論經義奇之遂許  
字焉母生而端淑有志操讀書通孝經及列女傳年十  
三喪母褚哀毀過甚十七歲歸祖契言動舉止皆準禮  
法鹽齋公夙疾母治羹理藥唯謹病亟目不交睫者四

十餘日及歿衾殮皆身經理必誠必信親黨謂母嫻于禮湯固世胄後家漸落堂上甘旨之需常鬻簪珥市之歲祲躬咽糠粃子斌見之戒勿聞大母恐損老懷也祖契性豁達喜賓客常儲美醞以待每出遊梁宋間數月不返母持家務姻戚歲時問遺不廢素善病一室蕭然見者難堪母獨怡然崇禎庚辰李自成擁眾數十萬縱橫開歸間兼之頻年荒旱飢民相率從賊母嘗對祖契嘆曰身爲婦人事有不測斷無苟全之理姑老子幼請以一身謝夫子矣爲女治嫁斌年未弱冠亦爲受室

年壬午三月賊潰西華先令斌從伯父賁皇讀書城北  
村舍倉卒聞亂城閉不得入母向人曰遣之意固有在  
來則俱死無益爲語吾兒善自立身勿忘母平日言也  
未幾城陷遂整襟經于梁家人解之復入井家人又出  
之母怒曰若教我偷生乎賊至而不死非節也死不以  
時非義也時賊已環至露刃相向母厲聲罵賊遂見殺  
顏色不變賊嘆息羅拜時崇禎十五年三月二十五日  
年三十七後遇忌辰陰雲四合悲風夜鳴居人傳其期  
比寒食云

歲寒老人曰余來中州詢甲申大難事輒知母節烈狀  
嗣兩河人往往稱斌之賢則又知母能教子而更著其  
節也斌自狀其母有曰斌初就外傳歸必課所讀書一  
日偕同學出城外抵暮而歸母端坐不食切責之曰汝  
年少志趣未定而樂嬉遊吾將何望嗟乎湯母可謂教  
子明大義者也雖古斷杼惜陰之訓何以加諸母生平  
大節于此徵之斌之學術於此基之矣厯稽往史獨怪  
馬遷不爲婦女立傳而班固亦復略之自漢中興以後  
范史綴其成事搜次鮑宣妻以下凡若干人而魏晉

宋諸史皆效法焉若湯母者事舅姑以孝相夫子以義  
且成其子爲名儒復致命于喪亂之日追配前休不爲  
尤烈耶嗚呼此不惟可爲內則世之鬚眉男子自稱問  
學所遇稍殊輒爲改易者視此亦可自勵矣

李節婦于氏傳

邠州古立節地也民淳俗美宋有橫渠張子明有曰仁  
徐子司教化於上鄉之人有鄭秀者樹節烈於前故士  
人知重節義至閭中之婦夫逝而守節終身者踵相接  
也乃余所聞李節婦于氏則又其最著云氏定州衛籍

而家於祁之曲堤村父名一躍母吳幼嫺女訓十五歲  
歸李君好古稱好合焉門以內肅然有秩門以外靜不  
聞聲無柰琴瑟中斷好古竟齋志沒氏二十九歲遺孤  
艾蘭纔三歲耳水漿不入口者數日誓以死殉父母泣  
諭曰昔人稱死節易立孤難徒引決爲快汝志畢矣其  
如藐孤何氏悟曰吾不能取李氏孤兒長養成立使延  
一線吾何以見夫子於地下乃強存視息上事孀姑下  
撫稚子飢而食寒而衣勞悴千端艱苦萬狀父母憐之  
微諷以他室富貴則悲號不食曰如不諒予誓有一死

敢二其心乎父母初以愛生憐繼以懼生敬無復再爲  
是言矣久之家計益窘至不能具饗殯挈子若女就養  
外氏而付其姑于叔弟歲時歸省甘旨不缺至祭祀必  
躬必潔勿之有悔外氏向固以懼而生敬者數歲相依  
不忍言勞後自外氏歸孤兒漸有成立乃一意訓讀不  
丙夜不休書聲與機聲相響答又時取兒課文觀之視  
所點竄爲憂喜凜然義勝於慈愛而能勞以故孤兒弱  
冠成饒士甫壯登賢書氏爲之喜加一餐繼而泣謂艾  
蘭曰爾有今日爾父之目可瞑爾母之心稍慰然非外



氏豈能有今日耶艾蘭泣受教蓋至是良人有母氏爲之拮据敬養始無愧爲李家婦良人有子氏爲之鞠育撫摩始無愧爲李家母良人有子宜教氏爲之訓誨啟迪始無愧爲李家師良人有子宜家氏爲之內外經營始無愧爲李家督氏之所以隱忍不死視畢命一旦凍餓人之父母而斬絕人之後嗣者其難易何如哉迄今艾蘭向予追述往事兩目欲斷寸心幾折慟尙殷殷也氏守節三十八年享年六十有七其生也任重道遠其沒也體受歸全此於功令宜旌艾蘭謂時尙可待也意

若謂母三十八年孤燈夜雨茹鹽食淡之苦揭日月而行中天節已成矣豈復以旌不旌遂有顯晦哉子輿云守身爲大予謂婦不守身無以成其節臣不守身無以成其忠子不守身無以成其孝孝子也忠臣也節婦也一而已矣乃婦人之貞多見於荒村冷巷而臣子之節則難槩望於顯士通人此非習詩書秉禮義義冠博帶之士反出閭閻女流下蓋陰陽消長之數所由來遠矣從古治日少而亂日多君子少而小人多明示陽之不能敵陰故陰曰羣陰陽曰孤陽激而言之至謂舉世皆

婦人滿朝皆婦人總嘆冠而笄者之不可勝數得不借笄而冠者以爲維風祗世之機艾蘭舉壬午孝廉今且十年矣生不及識父又未得以祿養母恐此後居高食厚當必有恫於心者矣予南行過祁撮其大者爲之立傳其詳有刁子包所誌之墓文在

耿烈婦王氏傳

烈婦王氏太康諸生耿於彝妻也壬午三月十八日闖賊圍太康城氏卽以死誓及城破屬子帝德自我死必矣汝儻得存當讀書自立我死無恨賊至遂罵賊求死

賊首曰貞婦也釋之氏乘間投井已折一股羣賊復撈出氏罵益厲賊因斷其舌絕其頸老僕婦郭氏相從目詳其事氏死之四日帝德往收其屍頸斷口邊血漬猶新顏色如生覆於淺土後有人移其屍於他所其家未知也忽白晝其姑白若氏憑之者爲言死時得快其志第骸骨暴露令深掩之驗之果然氏中書王永隆次女死年三十二

歲寒老人曰予生平聞死節婦女多矣而烈氣貞心如王氏者不槩見其罵賊求死也志已素定至於斷舌斷

頸不稍屈而魂魄猶以得死爲愉快噫凜烈丈夫到頭  
未免失其素節一巾幘婦乃剛決至此壯哉予爲傳之  
他日青史定有特書其事者

孫節婦張氏傳

順治己丑夏六月土寇乘容城孝廉孫君爾禎之子諸  
生立德遇害其妻張號泣護以身引頸受刃賊義之不  
忍殺張復投井水淺得不死遂髡兩鬢不粒食者三日  
旣又縊於窗眾奔救得甦張自是始以撫孤爲念孝廉  
家固貧張承以勤儉躬自織紉凡子衣食紙筆率皆機

村所經營一日以課業稍違祖訓張泣請受杖眾稱其  
賢姑多病晝夜榻側無少怠庚子姑復患痢適氏亦抱  
病猶侍左右一夜嘗數起執燈滌淋褥姑食息離婦不  
歡明年姑病愈張一病遂不起舅姑咸稱其孝其子瑾  
暮年入邑庠能知母之節千里外乞一言余與孫氏交  
蓋四世矣心儀孝廉之高風而重其子婦之節孝急爲  
擢管且孝廉君有女適同邑宋茂才琮十九歲稱未亡  
人今已十五年矣撫孤鎭將有成與張以雙節稱里閭  
益見孝廉刑于之化他日司風化之責者當以余言爲

徵也節婦父張嘉遇山東招遠知縣守節時年二十八卒年纔四十

歲寒老人曰國家旌節之典三十後守節者不與焉守節不過五十亦不與焉史遷不爲節婦立傳班固節婦傳亦在蓋棺之後孝廉女故附張氏傳中張氏之節以孝著張氏之孝以子能有成益著也惜天不假以年後有論者當以完節爲張氏重不必以天年爲張氏憾也

劉母葉孺人傳

孺人古杞葉氏朝棟之女也年十歲許同邑劉公時志

之子允時兩家皆殷厚比數年時志物故產日落至無  
雖立葉之老婦密告孺人曰阿姑席富腴而劉最貧豈  
能同事貧賤耶孺人掩戶自搥誓不欲生以爲出自父  
指也父聞急救之鞭老婦以明意及笄延允於家氏自  
甘麤糲勤紡績佐夫子又能治生積歲月所餘頗不仰  
給於外氏天啟丙寅允忽感寒疾而逝時孺人年三十  
有六矣遺四子一女呱呱一室中伶仃孤苦莫我顧者  
嘗撫其孤泣曰未亡人所恃者望若輩成立耳聞孟母  
三遷教子後成大賢吾劉氏之先未聞有起家詩書者



以堪輿家言卜牛眠囊允葬事復與弟諸生登視諸子  
所就各授之業令鴻業鴻聲就外傳餘荷鋤壟畝間當  
此時田賦婚嫁所入不給恒貸於權子母家後索積遺  
緒曰若何不鬻此產尙望有興盛時耶母聞而益勵諸  
子卽室無升斗而延師愈篤歲丁丑闔氛肆虐屠戮州  
邑孺人預戒子婦曰世亂矣貧賤尙可苟全衣飾悉宜  
棄去敗絮敝衣當各儲之迄賊至所過殺傷最慘獨劉  
氏闔門免於難孺人復謂諸子曰賊焰方張避地當亟  
棄家來河朔卜居輝邑之南郭雖流離貧困以十指爲

子婦先令諸子服賈餬口教鴻聲未嘗一日廢學己卯  
得補博士弟子員孺人方冀漸慰夙志辛巳四月忽聞  
弟登被賊執不屈罵賊遇害孺人哀痛致疾竟致不起  
輝廣文劉君復古束芻樞前手書栢舟冰操以表其節  
諸子復歸櫬合葬於杞之南柳莊年五十有三里人服  
其德甲午鴻聲特恩選拔癸卯舉於鄉孝友力學孫曾  
繁衍天報母節當昌其後云女適汲邑李新基與鴻聲  
同選

歲寒老人曰古稱內行不踰閭劉母之賢何較著若此

哉余來蘇門鴻聲從余遊每每道母氏懿訓至是屬余  
作傳余嘗謂哲婦隆家人之道貞女亮明白之節徽美  
可述也而遷固咸漏焉若劉母者所值不天能成已之  
節復成子之學邁跡前人妻道無成而代成有終母之  
成劉氏也大矣且蘇門一片地堯夫不爐不扇地也元  
有趙仁甫姚公茂許平仲寶子聲諸公皆盡室來移蓋  
中心所慕別有應求母一巾幘流耳當家室之忽摧痛  
機杼之是屬三遷之訓爰卜蘇門鴻聲蓋以守身爲事  
親之實立志爲願學之事又豈陶母之望士行范母之

望孟博可以自慰其母耶鴻聲勉之第求無負其母可也

傳贊

李都督涑先傳贊

吾鄉知後之有楊忠愍而不知前之有李忠愍也李忠愍以世職洪永間授浮圖峪守備積功至總兵鎮遼陽癸丑之役以一當千連戰四十餘里至八角大蟲嶺環圍數十里與長子松俱戰死事聞贈少保謚忠愍亦烈矣歿之後表章無人鄉黨且不傳後死者之過也無怪

平古之英人烈士多湮滅而不聞也

胡向化崔庚傳贊

向化爲孝廉時僉院左光斗逮至過白溝人鮮有不避  
者向化往謁以爲諸生曾受知也丙子吾鄉有兵慘向  
化恤刑山西過里以士女節義入告至疏鹿奉常其辭  
曰鹿善繼生爲理學主盟死以封疆殉節視居城內城  
破而不得不死者不同時以爲知言崔庚爲淇縣令振  
起凋敝大著循聲河南通志錄其實到處有惠政人歌  
思之爲人坦率忘形跡嘗有甯人負我勿我負人之意

歸田仍一寒士也居官受吳橋范景文之知居鄉受定興鹿善繼之知嘉善魏大中顏其讀書之室曰歲寒居殆所稱君子一流與

孫爾禎爾祚侯保傳贊

爾禎三十年孝廉食貧教書不慕榮祿齋志而歿淵明詩曰高操非可攀深得困窮節爾禎殆庶幾乎予已誌其墓祚其弟保其女弟夫名諸生也甲申致廩餼於學使者徜徉山水間妻子饑寒亦不暇顧祚死于邱縣之勝永村保隱于烏龍溝祚所著有四書事實保所著有

讀史心見聞有有心人爲立傳夫人終身享榮名富厚者衆矣未必皆才而才者反以厄窮死予不悲二子之窮安知千載下無憑而弔之者曰志士不忘在溝壑

張果中傳贊

朱祖文多嫚行獨書其爲吏部者專言之也果中生平可述者多獨舉乙丙周旋左魏事亦專言之也果中爲辛酉左學院所選士魏給事實言于學院而絕口不言再詢之第云衡文者具隻眼張生高才自應當此選敢貪天功耶後左爲予言給事自不認但不可令知我者

不知也迄二公遠爲果中者倘遠避之唯恐累已豈人  
情也哉



夏學集

卷八

五

夏學集卷八

王任謹校